

Carta nachindahá Pablo nuú na cúu cuéntá Jesús ndúu ñuu Filipos

Carta nacahyí Pablo nuú na cúu cuéntá Jesús ndúu ñuu Filipos nani nasandacqaan da vecaa

¹ Yehe cúu Pablo ta cája chúun i xihín Timoteo cuéntá Jesucristo. Ta cáhyí nde carta yóho nu tóco ndihi na cúu cuéntá Jesús, na ndúu ñuu Filipos jáchi in nanduu na xihín Jesucristo. Ta cáhyí ri nde carta yóho nuú na sacuahá nuú na cúu cuéntá Jesús xihín nuú na chindeé mé na sacuahá veñuhu.

² Xíca tahví i nu Ndióxi, tátá yo xihín nuú Jesucristo, xitoho í ña ná caja cuahá mé á ñamani xihín ndo ta ná caja mé á ña ná coo vaha ini ndó.

Xíca tahví Pablo nu Ndióxi sahá na cúu cuéntá Jesús

³ Ndíquiahva ndivaha i ndixahvi nu Ndióxi tá ndícuahun ini i sahá ndo.

⁴ Níi tiempo tá xíca tahví i nu Ndióxi sahá ndihi ndo cájii ini i.

⁵ Jáchi janda tá nandiquehe ndó íchi cuéntá Jesús ta janda viti nachindeé ndó yehe cáhan i tuhun Ndióxi xihín ñayivi.

⁶ Nacasahá Ndióxi cája ña ná nduu ndó ñayivi ndaa nu mé á ta xini vaha i ña jáxinu coo a ña janda quiahva ná xinu coo quiví quixi tucu Jesucristo ñuyiví yóho.

7 Cája i cuéntá vaha ndivaha va ndíquiahva i ndixahvi nu Ndióxi saha ndo jáchi mé a ndaa quíhvi ndivaha ini i ndohó. Tá quiahva cája Ndióxi ñamani xihín i quiahva já cája ri a ñamani xihín mé ndó. Ta coó caja toho a tá ndacaan i vecaa. Ta coó caja toho a tá ná ndiquehe vaha i sahá tuhun Ndióxi nuú na jutixia á tá caxi tuhun i xihín ñayivi ña mé a ndaa cúu á tuhun Ndióxi, ña cúu jácacu ñayivi.

8 Ta cándaa cáxi ini Ndióxi ña quíhvi ndivaha ini i ndohó tá quiahva quíhvi ini Jesucristo ndohó.

9 Xíca tahví i nu Ndióxi ña ná xinu ini ndó quíhvi chága ini ndó ñayivi. Ta ná ndindíchi chága jini ndó ta ná coo chága xini túni ndo.

10 Já ná cuu caxi ndó ña vaha chága níi tiempo ta xihín ña yóho cacuu ndó ñayivi ndaa, na co ndójo cuachi tá ná xinu quívi quixi tucu Jesucristo.

11 Ndítahan caja ndó ña vaha xihín ndinuhu ini ndó jáchi xihín ña yóho jánaha ndó nuú ñayivi ña mé a ndaa cúu ndó cuéntá Jesús ta xihín ña yóho ndicáhu ndivaha Ndióxi.

Ná caja í ña cúni Jesucristo xihín ndinuhu ini i

12 Candehé ndó, ñani mí i, na cúu cuéntá Jesús. Cúni ña ná cándaa ini ndó ña ndóho i vecaa yóho. Mé a ndaa sahá ña ndacaan i vecaa yóho naxini johu cuaha chága ñayivi tuhun vaha sahá Jesucristo.

13 Tóco ndihi soldado, na ndúu vehe rey yóho xihín java ga ñayivi sa cándaa ndihi ini na ña ndacaan i vecaa sahá ña ndíco i íchi cuéntá Jesucristo.

14 Ta sahá ña naçandaa ini cuahá na cúu cuéntá Jesús ña ndácaan i vecaa yóho, nandindeé ini na caca nuu na cahan na tuhun Ndióxi xihín ñayivi ta co yíhví na caja na ña jáchi cándeé cáhnu chága ini na Ndióxi viti.

15 Mé a ndaa ndúu java na xíca nuu cáhan tuhun Ndióxi nuú ñayivi sahá ña cáhíhvi cuití ini na. Ta java na cája na ña jáchi cúni na cayojó na nuú i. Joo mé a ndaa java na cáhan na tuhun Ndióxi sahá ña cúni na caja na ña vaha.

16 Joo java na cáhan na tuhun Ndióxi sahá ña vaha mé cuití va na ta co cája na ña xihín ndinuhu ini na. Ña cúni na caja na quéa jáquihvi chága na yehe nani ndácaan i vecaa yóho.

17 Joo mé a ndaa java na cáhan na sahá Jesucristo jáchi quíhvi ndusa ini na yehe ta sa cándaa ini na ña nasacu Ndióxi yehe yóho ña ná ndiquehe e sahá tuhun vaha cáhan sahá Jesucristo.

18 Joo co sáhní toho i mí i ndá saha cája na ña jáchi cáji ini i tá cáhan na sahá Jesucristo nuú ñayivi. Ta cáji chága ini i

19 jáchi cándaa ini i ña quee vaha i nu tóco ndihi ña ndóho i yóho sahá ña chindeé ínima Jesucristo yehe ta sahá ña xíca tahví ndó nu Ndióxi sahá i.

20 Cándeé ini i ña a cándo nuu i. Ta ndáti tiahva i chindeé Ndióxi yehe já ná cuu cahan i sahá Jesucristo nuú ñayivi. Xihín ña cáhan i yóho jánaha i ndá quiahva cáhnu cúu Jesucristo. Ta co cája toho a á tácu u á na xihí i jáchi caja cáhnu tá caja cáhnu i Jesucristo.

21 Ta nani tácu u ín i ñuyíví yóho cája cáhnu i Jesucristo xihín ndinuhu ini i. Ta tá ná quivi i já

vaha chága ví jáchi cuhun i coo i xihín mé á.

22 Ta co cándaá ini i ndíá vaha chága jáchi tá ná catacu u já cuu ñehé chága íní i cahan i sahá Jesucristo xihín ñayivi.

23 Ivi joho cáhvi ini i ña á vaha chága ná catacu u á vaha chága ná quivi i. Jáchi tá ná quivi i ivi laá xinu coo i coo i xihín Jesucristo. Ta vaha chága ná cuhun i coo i cán a juú ga ña ná coo i ñuyívi yóho.

24 Joo saha mé ndó xíní ñúhú coo tóo chága i ñuyívi yóho.

25 Ta viti cándaá vaha ini i ña coo chága i ñuyívi yóho ña ná chindeé e ndohó catiahva chága ndó tuhun Ndióxi já ná cajji chága ini ndó sahá ña cándeé ini ndó mé á.

26 Sahá ña cán quéa cuu cajji ini ndó sahá ña coo tucu u xihín ndó ta cuu caja cáhnu ndó Jesucristo sahá ña yóho.

27 Cúni ña ná ndihi ini ndó caja ndó tá quiahva cáchi tuhun vaha cahan sahá Jesucristo. Já quéa tá ná saa i á tá ná a saa toho i coto nihni i ndohó cúni ñehé e tuhun ña in cúu ndihi ndó ta ndúu ndacú ndo cuéntá Ndióxi. Ta cúni ñehé e tuhun ña in cúu ndó ndúcú ndéé ndo cahan ndó tuhun vaha sahá Jesucristo nuú ñayivi ña ná candeé ini na mé á.

28 Ta coto a quiahva ndó ñamani nuú na ihvi ndo jan ña ná jáyihvi na ndohó. Jáchi xihín ña yóho cándaá ini na cán ña xíca na cuahan na nuú ndihi saha ná. Joo mé ndó cándaá ini ndó ña xíca ndó íchi nuú cacu ndaa ínima ndo caja Ndióxi.

29 Jáchi sahá ña naja Jesucristo ñehé táhvi ndó candeé ini ndó mé á. Ta quiahva já ñehé táhvi ri ndó ndóho ini ndó sahá ña cándeé ini ndó mé á.

30 In nuú ndóho íní sahá Jesucristo. Sa naxini

ndó ndá quiahva nandoho ini i jihna. Ta sa ñéhe ndó tuhun ndá quiahva ndóho ini i viti.

2

Nanduu Jesucristo ñayivi vatí cúú á Ndióxi

¹ Xíni vaha i ña sáhan Jesucristo tuhun ndeé ini ndó ta quíhvi ini a ndohó. Xíni vaha i ña in nanduu ndó jáchi ndácaan ínimá yíi Ndióxi ini ínimá ndo. Xíni vaha i ña quíhvi ini táhan ndó ta táhnda ini saha táhan ndó.

² Sahá ña cán quéa ndítahan caja ndó ña ná caji ndivaha ini i sahá ña in cúú ndihi ndó ta sahá ña quíhvi chága ini táhan ndó. Ta sahá ña in nanduu ndó nacaja ínimá yíi Ndióxi já in nanduu xíní túni ndo nuú ña cúni ndó caja ndó.

³ Coto a ndúcú cuachi xihin táhan ndó. Ta coto a ndíñehe jícó ndo mé ndó. Ndítahan coo ndisáhnú ini ndó. Ta ndítahan cahán ndo ña cáhnu chága inga ñayivi a juú ga mé ndó.

⁴ Ta co ndítahan ndihi ini ndó sahá ña vaha mé ndó cuití va. Xíní ñúhú ndihi ri ini ndó sahá ña vaha inga na.

⁵ Xíní ñúhú cahvi ini ndó tá quiahva nasacahvi ini Jesucristo.

⁶ Jáchi tá quiahva íin Ndióxi quiahva já íin Jesucristo. Ta vatí cúú á Ndióxi joo coo nandaja cáhnu a mé á vatí cuu caja ña, nduu.

⁷ Ña nacaja Jesucristo quéa nasacu xóo a tóco ndihi ña cáhnu cúú mé á cán ta naquixi a nacacu a ñuyíví yóho tá quiahva cácu ñayivi. Ta nasacuu a in daṭaa, da cája chúun cuéntá xitoho da.

⁸ Tá nandihí nanduu a ñayivi já najánuu a mé á janda quiahva nasahan mé á quivi a ndica crúxu nuú naxihí a tátuhun da cája cuachi quini.

⁹ Sahá ña cán quéa najándindita jíco ndivaha Ndióxi Jesucristo ta nasahan in quivi á nu á ta quivi Jesucristo yóho quéa cáhnu chága nu tóco ndihí quivi.

¹⁰ Sahá ña cán quéa tóco ndihí na ndúu indivi xihín na ndúu ñuyiví cuni johó na quivi Jesucristo ta já ndaca xítí na nu á. Ta janda na ndúu tixi ñúhu ndaca xítí na nuú Jesucristo ña caja cáhnu na mé á.

¹¹ Anda jávi cahan in in na cán ña cúu Jesucristo xitoho na ta xihín ña yóho ndicáhnu ndivaha Ndióxi, tátá yo.

Na cúu cuénta Jesús cúu ná tátuhun ñúhu, ña jándiyehé ñuyiví yóho

¹² Candehé ndó ñani mí i, na cúu cuénta Jesús. Tá quiahva nacandúsa ndó caja ndó ña nasahnda i nu ndo tá nasahin i tañu ndó jan quiahva já ndítahan candúsa chága ndó yehé viti nani in xíca i nu ndo. Xíní ñúhú ndihí ini ndó caja ndó ña cúní Ndióxi jáchi najáca cu a ndohó. Ta xíní ñúhú cayihví ndó Ndióxi nani cája cáhnu ndó a xihín ndinuhu ini ndó.

¹³ Jáchi Ndióxi quéa cája ña xíca ini ndó caja ndó ña vaha ta chindeé a ndohó caja ndó ña táhan ini mé á xihin.

¹⁴ Ta a cahan cuachí ndo saha tóco ndihí ña caja ndó. Ta ni a ndítuhún ihvi xihin táhan ndó.

¹⁵ Já ná nahá ña cúu ndó ñayivi vií, na coo cuachi. Ndítahan caja ndó tá quiahva cája na cúu jahyi Ndióxi, na co cáquini xihín cuachi ña caja

ñayivi quini cuéntá ñuyíví yóho. Cúú á tátuhun ndíyihví ndaa ndó xihín ña vaha cája ndó tá quiahva ndíyihví ndaa quimi indiví.

¹⁶ Jáchi cáhan ndó tuhun vaha sahá Jesucristo nuú ñayivi já ná cuu catacu na anda ama cáa quivi. Tá ná caja ndó ña yóho já quea cajii ini i xihín ndó tá ná xinu quiví quixi tucu Jesucristo. Jáchi xihín ña yóho candaa ini i ña a juú ña uun nasacuu chuun nacaja i.

¹⁷ Ta vatí ná ndiquiahva i mí i quivi i saha ndo joo cajii tá cajii ini i. Jáchi tá ná quivi i cúú á tátuhun catáhan i xihín ña joco ndó nu Ndióxi sahá ña cándéé ini ndó mé á. Ta sahá ña yóho cajii ini i ta in nuú cajii ini ndihí.

¹⁸ Sahá ña cán quea ndítahan cajii ini mé va ndó já ná cajii ini ndihí.

Sácú ini Pablo chindahá da Timoteo xihín Epafrdito nuú na ñuu Filipos

¹⁹ Ta cúni Jesucristo, xitoho í chindahá yachi i Timoteo nu ndo ña ná cañehe da tuhun saha ndó nuú i. Anda jáví cajii ini i tá ná candaa ini i saha ndo.

²⁰ Mé a ndaa quíhvi ini da ndohó ta coó ga inga da ñúhu ini saha ndo tá quiahva ñúhu ini yehe saha ndo.

²¹ Jáchi java ga na cúú cuéntá Jesús ndícani ini na sahá ñaha mé va na ta co ndícani ini na sahá ñaha cuéntá Jesucristo.

²² Joo sa xini ndó ña cúú Timoteo ta vaha ndivaha ta sa candaa ini ndó ndá quiahva chindeé da yehe nu xica i cáhan i tuhun Ndióxi xihín ñayivi. Cúú dá tátuhun jahyi i jáchi chindeé cuahá da yehe.

²³ Sahá ña cán quéa sácú ini i chindahá i da nu ndo tá sa nacandaa ini i ndaja cáa sahá i.

²⁴ Ta cándeé ini i ña quiahva Ndióxi ñamani nuú i saa yachi mé vi coto nihni i ndohó jan.

²⁵ Cája i cuéntá xíní ñúhú chindahá i ñaní Epafrodito ña ná ndicó coo tucu da nu ndo jáchi mé ndó nachindahá ndó da nuú i ña ná chindeé da yehe. Ta mé a ndaa cuahá ndivaha nachindeé da yehe janda quiahva nandoho ini da xihín i.

²⁶ Joo viti xíca ndivaha ini da cuni ndihi da ndohó. Ndícani ini da saha ndo jáchi nañehé ndó tuhun ña sa naquihvi da.

²⁷ Ta mé a ndaa nandoho da cuehe ta jalóho quivi da, nduu. Joo nacaja Ndióxi ñamani xihín da ta já ndivaha da. Ta xihín ña yóho nacaja ri mé á ñamani xihín yehe ña ná a cácuéha chága ví ini i jáchi sa ín cuaha ña ndóho i viti.

²⁸ Sahá ña cán quéa chindahá númí i da ña ná saa quíi dá nu ndo já ná cajii ini ndó cuni tucu ndó da ta xihín ña yóho ndivaha ri ini yehe va.

²⁹ Ndítahan cajii ini ndó ndiquehe ndó da jáchi cúú dá ñani ndó da cúú cuéntá Jesús. Ta ndítahan coo toní ñúhú ndó xihín tóco ndihi na cája tá quiahva cája mé dá.

³⁰ Jáchi mé a ndaa jalóho quivi da sahá chuun nacaja da cuéntá Jesucristo. Cuahá ndivaha tondóho naquixi nu dá sahá ña nachindeé da yehe jáchi nacaja mé dá ña a cúú caja mé ndó yóho sahá i.

3

Ña ín chága saha nu Ndióxi

¹ Candehé ndó ñani mí i, na cúú cuéntá Jesús. Xíní ñúhú cajii ini ndó xihín ña cája Ndióxi. Co cája toho a nu mí i cáhyí ivi tucu u ña sa ñacahyí i nu ndó jihna jáchi chíndeé a ndohó.

² Cuéntá coo ndó xihín ñayivi quini, na xíca cája ña núu jan. Jáchi jánahá na ña ndítahan cahnda ndó yiquí cuñu ndó ña ná chícaan ndó marca yiquí cuñu ndó já ná cacuu ndó cuéntá Ndióxi.

³ Joo mí co cándúsa í ña cúú yó cuéntá Ndióxi sahá ña sáhnda yo yiquí cuñu í vatí mé a ndaa cúú yó tátuhun na ñaquihvi marca yiquí cuñu sahá ña cája cáhnu í Ndióxi jáchi ndácaan ínima yii mé á ini ínima yo. Ta viti cájii ini yo sahá ña cúú yó cuéntá Jesucristo. Co cándeé ini ña cája í

⁴ vatí mí i cuu cachi i ña cándeé ini i ñaha ñacaja i, nduu. Jáchi ñasacaja i ña cáchí ley xihín ndinuhu chága ini i a juú ga inga na.

⁵ Jáchi tá naxinu una quiví ñacacu u já ñachicaan na marca jan yiquí cuñu i. Ta mí i cúú u da Israel, da ñaquixi chíchi Benjamín. Ta tátá náná i ñaquixi na chíchi Israel ta cáhan nde tuhun hebreo. Ta ñasandico i táhan da cúú fariseo, da sácú vaha ley Moisés. Ta ñacaja i tóco ndihi ña ñasahnda ley Moisés.

⁶ Ñasandico cáhnu ndivaha i íchi cuéntá na fariseo cán sahá ña cán quéa ñacasahá ñandicujita i cája xíxi i xihín na cúú cuéntá Jesús. Xihín ndinuhu ini i ñacaja i tóco ndihi ña cáchí ley sahá ña cán quéa ni in na coo ñacuu chícaan na cuachi jatá i saha ley Moisés.

⁷ Tóco ndihi ña yóho ñasacuu a ña náhnu ndivaha nuú i. Joo viti coo sahá ga ña cán nuú i jáchi ñacasahá cándeé ini i Jesucristo.

8 Ta mé a ndaa yahvi chága ña cándeé ini i Jesucristo a juú ga tóco ndihi ña ñacaja i jihna. Sahá ña cúní candaá chága ini i sahá Jesucristo, xitoho i sahá ña cán quéa najándacoo i tóco ndihi ña ñacaja i cán. Ta tóco ndihi ña cán cúú á tátuhun xehe ta coó sahá toho a nuú i viti jáchi cúní candico chága i Jesús.

9 Ta cúní cacuu u in da in ná nduu xihín Jesucristo. Joo co ndátí i nduu ndaa i nu mé á sahá ña sácú vaha i ley Moisés jáchi xíní vaha i ña cája Ndióxi ña ná nduu ndaa i nu mé á sahá ña cándeé ini i Jesucristo cuití va.

10 Ña cúní quéa candaá chága ini i sahá Jesucristo. Ta cúní ña ná chutú ndaa ínima i xihín ndée Ndióxi, mé ndée ña ñacaja ña nanditacu tucu Jesucristo. Ta cúní ndoho ini i tá quiahva nandoho ini mé á tá naxihí a ndica crúxu.

11 Já quéa ndátí i xinu coo quiví nditacu u tá ná nditacu na sa naxihí.

Ndítahan nducú ndée yo janda quiahva ná xinu coo í ndiquehé ña quiahva Ndióxi nu yo

12 Co cúní cachi i ña sa ñaquee vaha vi. Ni co cúní cachi i ña sa naxinu coo i cúú u in taa ndaa tátuhun cúní Ndióxi. Ña cája i quéa ndíhi ini i jáxinu coo i cacuu u in da cája tá quiahva cúní Jesucristo jáchi sahá ña cán najácacu a yehe.

13 Candehé ndo ñani i, na cúú cuénta Jesús. Co cúní cachi i ña sa nanduu u tá quiahva cúní mé á. Ña cája ndusa i quéa ndíndójó i sahá ña ñasacaja i jihna ta ndíhi ini i jáxinu coo i cája i ña sácú ini Ndióxi caja i.

14 Já caja i janda quiahva ná xinu coo i ndiquehe e ña sácú ini Ndióxi quiahva nuú i sahá ña nacaja Jesucristo. Jáchi cána Ndióxi yehe cuhun i coo i indivi xihin mé á.

15 Tóco ndihi mé ndó, na sa nandindacú xihin ña cándéé ini ndó Ndióxi, xini ñuhú cahvi ini ndó tá quiahva cáhvi ini yehe. Ta tá co cáhvi ini ndó tá quiahva cáhvi ini yehe já quéa jándiyéhe Ndióxi xini túni ndo ña ná cajii ini ndó xihin á.

16 Joo ndítahan nu yo caja i ña ndaa, ña coó najándacoo í cája í anda viti.

17 Candehé ndo ñani i, na cúu cuéntá Jesús. Ndítahan candehé ndo ndá quiahva cája yehe ña ná caja ndó ña. Ta ndítahan candehé ndo ndá quiahva cája java ga na sa najána ha nde jáchi nacatiahva na cája na tá quiahva cája mé nde.

18 Sa cuahá ndivaha tañu nacachi i ña yóho xihin ndó ta viti táhvi ticui nuú i cáhan tucu u ña xihin ndo. Ndúu cuahá ñayivi ta cáchi na cúu ná cuéntá Jesús joo cája na tátuhun na co cándúsa ña naxihi Jesucristo ndica crúxu.

19 Joo vaxi quivi ndihi saha ná anda ama cáa quivi sahá ña núu cája na jáchi a juú quiahva ndihi ini ná sahá ña xixi na. Ta ndíñehe jíco na mé ná sahá ña núu cája na ta chí coo a cácan nuu ná. Ñaha ñuyivi yóho cuití va cáhvi ini na saha.

20 Joo mí cúu yó ñayivi cuéntá Ndióxi, na canduu indivi xihin mé á. Ta ndáti tiahva i ña quixi Jesucristo, xitoho í chí indivi, mé á jácacu mí.

21 Ta ndijama mé á yiquí cuñu í, ña nacavitá já ná nduu a tátuhun yiquí cuñu mé á jáchi cáhnu ndivaha cúu á. Ta ndijama mé á mí xihin ndée a

jáchí mé á sáhndá chuun nu tóco ndihi ñaha xihín ndée á.

4

Xíni ñúhú cajii ini ndó xihín ña cája Ndióxi xihín ndo

¹ Candehé ndo ñani mí i, na cúu cuéntá Jesús. Xíca ndivaha ini i cuni i ndohó jáchi quíhvi ini i ndohó. Ta cájii ndivaha ini i xihín ndo jáchi co cácahan nuu i saha ndo. Cúni ña ná candico ndacú ndo íchi cuéntá Jesucristo, xitoho í.

² Xíca tahví i nu Evodia xihín nu Síntique ña ná ndique táhan vaha na jáchi in quíhvi cúu ná cuéntá Jesús.

³ Ta xíca tahví i nu mún, da cája chúun tuun xihín i ña ná cajún ñamani cahún xihín ndíví quiahva i jan ña ná ndique táhan máni ná. Jáchi ndíví na jan nachindeé cuahá na yehe tá naxica nuu i nacahan i tuhun Ndióxi, mé tuhun cúu jácacu ñayivi. Ta quiahva já nachindeé ri ñaní, da naní Clemente yehe. Ta java ga da cúu cuéntá Jesús nachindeé táhan na xihín i. Sa ndáa va quivi ná nu libro nu ndáa quivi tóco ndihi na catacu anda ama cáa quivi.

⁴ Níi tiempo ndítahan cajii ini ndó xihín ña cája Ndióxi xihín ndo. Á sa xini joho ndó. Níi tiempo ndítahan cajii ini ndó.

⁵ Ta xihín ña yóho candaa ini tóco ndihi ñayivi ña cúu ndó ñayivi vaha ini. Sa nacayati quivi quixi tucu Jesucristo, xitoho í.

⁶ A ndícani nahá ini ndó sahá ni in ñaha. Ña ndítahan caja ndó quea caca tahví ndo nu Ndióxi

ní tiempo ta ndicani ndó nu mé á ndaja cáa ña ndóho ndó. Caça tahví ndó nu á ta a ndíndójó ndo ndiquiahva ndó ndixahvi nu mé á.

⁷ Anda já caja Ndióxi ña ná coo vaha ini ndó ta cáhnu chága ña yóho a juú ga tóco ndihi ña cuu candaa ini ñayivi. Ta tá ná caja Ndióxi ña ná coo vaha ini ndó já quéa chindeé a ndohó já ná ndindacú ínimá ndo xihín xíní túní ndo sahá ña in nanduu ndó xihín Jesucristo.

Xíní ñúhú cahvi ini ndó caja ndó ndinuhu ña vaha

⁸ Jandá ña yóho cuití va cúní cahán i xihín ndo, ñani i, na cúu cuéntá Jesús. Xíní ñúhú cahvi ini ndó sahá ña ndaa ta sahá ña cuu coo toní ñúhú ndó xihín. Ta xíní ñúhú cahvi ini ndó sahá ndaja caja ndó ña ndaa. Ta xíní ñúhú cahvi ini ndó sahá ñaha vií. Ta xíní ñúhú cahvi ini ndó sahá ñaha cuu cajii íni ñayivi xihín, ña cuu cahán vaha na saha. Ta xíní ñúhú cahvi ini ndó sahá ña vaha cuu caja ndó ña ná cuu caja cáhnu ñayivi Ndióxi saha.

⁹ Caja ndó tóco ndihi ña najána ha i nu ndó caja ndó. Ndítahan caja ndó ña naxini johó ndó nacahan i xihín ña naxini ndó nacaja i. Ta ná coo Ndióxi xihín ndo ta mé á quéa caja ña ná coo vaha ini ndó.

Na cúu cuéntá Jesús ndúu ñuu Filipos chindeé na Pablo

¹⁰ Cájii ndivaha ini i ta ndíquiahva i ndixahvi nu Jesucristo, xitoho í jáchi nandicuhun tucu ini ndó sahá i. Co cúní cachi i ña sa nandíndójó ndó sahá i, vaha. Ña cúní i cachi i quéa co núná nu ndo chindeé ndó yehe.

11 Co cáhan i ña yóho xihin ndó sahá ña ndímaní ñaha nuú i jáchi sa nacatiahva i cájii íní i xihín ña íin nuú i.

12 Sa xíni coo ndáhví ndivaha i ta sa xíni i coo cuahá ndivaha ñaha nuú i. Nacatiahva i coo ndéé ini i nu tóco ndihi ña quíxi nuú i. Sahá ña cán queá íin vaha ini i vatí íin cuahá ña cuxu u á coó a. Ta vatí yójó ñaha nuú i á ndímaní ña nuú i íin vaha ini i.

13 Sáhan ndéé ini i nu tóco ndihi ña quixi nuú i jáchi Jesucristo queá chindeé a yehe caja i ña.

14 Joo vaha nacaja ndó jáchi nachindeé ndó yehe tá nandoho ini i sahá ña nandímaní nuú i.

15 Sa xíni ndó ña in túhún mé ndó, na cúu cuéntá Jesús ndúu ñuu Filipos jan cúu ndó na nachindeé yehe tá naquee e cuahan i chí Macedonia cahan i tuhun Ndióxi, ña cuu jácacu ñayivi. Ta nacaja ndó ña yóho jáchi nacamáni ndó yehe sahá ña nachindeé e ndohó xihín tuhun Ndióxi.

16 Jáchi tá nasahiin i ñuu Tesalónica cán já nachindahá ta nachindahá ndó ñaha nandímaní nuú i. Ta a juú in tañu cuití va nacaja ndó ña.

17 Co cáhan i ña yóho xihin ndó sahá ña cúni ñehe cuití vi ñaha. Ña cúni queá ná chahvi Ndióxi sahá ñamaní nacaja ndó.

18 Ta viti coó ga ñaha ndímaní nuú i. Janda yójó joho a nuú i viti xihin tóco ndihi ña nachindahá ndó xihín Epafrodito ñéhe da naquixi da nuú i yóho. Tóco ndihi ña nachindahá ndó nuú i yóho cúu á ña cájii ndivaha ini Ndióxi xihin. Cúu á tátuhun jóco ndó in ña támi sahan nu mé á.

19 Ta Ndióxi, mé a cája cáhnu i chindeé a ndohó ná a ndímaní ga ni in ñaha nu ndo. Jáchi cuahá

ndivaha ña cuicá cómi Ndióxi ta quiahva mé á ña nu ndo sahá ña cúu ndó cuénta Jesucristo.

²⁰ Cáhnu ná cacuu Ndióxi, tátá yo anda ama cáa quivi. Já ná coo.

Ndíndayí Pablo na cúu cuénta Jesús

²¹ Sahá ña in cúu yó cuénta Jesucristo chindahá i Ndióxi coo tóco ndihi na cúu cuénta mé á cán. Ta ñaní, na cúu cuénta Jesús ndúu xihín i yóho chindahá na Ndióxi coo ndó.

²² Ta jári java ga na cúu cuénta Ndióxi ndúu chí yóho chindahá na Ndióxi coo ndó. Ta na chindahá chága ví Ndióxi coo ndó cúu na cája chúun vehe da cómi cuénta sahá ñuu Roma.

²³ Ná caja Jesucristo, xitoho í cuahá ñamaní xihin tóco ndihi ndó. Já ná coo.

**Tuhun saá ña najá^{ndacoo} Jesucristo nu yo: El
Nuevo Testamento en el mixteco de
Silacayoapan
New Testament in Mixtec, Silacayoapan
(MX:mks:Mixtec, Silacayoapan)**

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

7f2d3ecf-6d15-55a5-9081-6e970474df2f